

Suhaimi kekal ketuai 4-B Pusat

IPOH, Isnin — Ketua Pemuda UMNO Malaysia, Datuk Haji Suhaimi Datuk Haji Kamaruddin, sekali lagi menang tanpa bertanding untuk mengetuai Pergerakan Belia 4B Kebangsaan, bagi tempoh satu penggal akan datang.

Tidak ada calon lain dikemukakan bila pencalonan ditutup baru-baru ini.

Bahan asal dari Arkib
Negara Malaysia

Pengumuman kemenangan Timbalan Menteri Pelajaran itu akan dibuat di konvensyen tiga hari pergerakan tersebut yang bermula 28 Disember ini, di sini.

Pemilihan semula Datuk Haji Suhaimi telah menolak desas-desus yang mengatakan beliau akan meletakkan jawatan penting itu kerana sekatan umur.

Pindaan undang-undang pergerakan tersebut dalam persidangan di Perlis tidak berapa lama dulu membolehkan mereka yang melebihi umur 40 tahun untuk terus memimpin 4B, sama ada di peringkat pusat atau negeri, kata satu sumber pergerakan itu hari ini.

Ini bermakna Datuk Haji Suhaimi, 41 tahun merupakan pemimpin paling lama mengetuai pergerakan tersebut sejak ia ditubuhkan kira-kira 13 tahun lalu.

Beliau mengambil alih jawatan tersebut dari Encik Kassim Shah, tokoh pertama mengasas 4B.

Terbesar

Datuk Haji Suhaimi yang juga Ahli Parlimen kawasan Sepang menerima pencalonan dari seluruh cawangan pergerakan tersebut di Semenanjung.

Berita Harian difahamkan, tiga orang lagi Naib Presiden 4B Malaysia juga menang tanpa bertanding.

Mereka ialah Haji Hanafi Ramli, wakil rakyat Kedah selaku Naib Presiden Pertama, Cik Zainab Satar dari Melaka, Naib Presiden Dua (wanita) dan Haji Paizal Shahrinza dari Wilayah Persekutuan, Naib Presiden Ketiga.

Setiausaha Kerja Pemuda UMNO Malaysia, Encik Zainal Abidin Husman juga dijangka akan dipilih semula selaku Setiausaha Agung pergerakan itu.

Menurut satu sumber, ketiadaan pencalonan lain untuk merebut jawatan-jawatan penting dalam pergerakan tersebut adalah berikutan satu kompromi di kalangan para pemimpin peringkat negeri.

Ia dibuat semata-mata untuk mengekalkan perpaduan dalam pergerakan tersebut - salah sebuah pertubuhan bella yang terbesar yang perlu dicontohi oleh pertubuhan-pertubuhan bella lain di negara ini.

Dalam konvensyen dua tahun lalu, jawatan-jawatan penting dalam pergerakan tersebut juga tidak dipertandingkan.